

Սիրելի հայրենակիցներ,

Պաշտօնավարութեանս գրեթէ երեք տարիներուն ընթացքին, «Լրատու»ի եռամսեայ կանոնաւոր հրատարակութեամբ, Կիպրահայութիւնը տեղեակ պահեցի մեր գաղութին հետ ամնչուող հարցերուն, ինչպէս նաեւ տարուած յստակ ու թափանցիկ գործունէութեանս մասին:

Այս թիւով, պարտք կը զգամ շատ կենսական հարցի մը շուրջ մտահոգութիւններս ձեզի հետ բաժնելու, որովհետեւ անոր անորոշ ապագան ու ներկայ ընթացքը, կը յուզէ ոչ միայն Կիպրահայութիւնը այլ համայն հայութիւնը: Վստահ եմ ենթադրեցիք, որ ակնարկութիւնս Սելզոնեան Կրթական Զաստատութեան վերջին իրադարձութիւններուն մասին է:

Ինչպէս բոլորդ տեղեակ էք, այս տարուայ Յունուար 22-ին, Զ.Բ.Ը.Մ. Կեդրոնական Վարչութեան ատենապետը տեսակցութիւն մը ունեցաւ Կիպրոսի Զանրապետութեան նախագահ Տիմիթրիս Խրիստոֆիասին հետ, ներկայութեամբ այլ անձնաւորութիւններու, քննարկելու Սելզոնեան Կրթական Զաստատութեան հողատարածքին ճակատագիրը եւ նոր ծրագիրներ կամ առաջարկներ ներկայացնելու կառավարութեան:

Խոցելի կէտը այն է, թէ գաղութս շահագրգռող ամենանուրբ հարցին կապակցութեամբ հանդիպում մը տեղի կ'ունենայ պետական մակարդակի վրայ, որու ընթացքին կ'անտեսուի Կիպրահայ Զամայնքի Պետական Ներկայացուցիչը, որ ըստ հանգամանքի, այս պարագային պէտք է առաջին հրաւիրուող անձը ըլլար: Անոր ներկայութիւնը կենսական պէտք է համարեն բոլոր կողմերը եւ ընդունին, թէ վերջ ի վերջոյ, ան կը ներկայացնէ Կիպրահայութեան փափաքներն ու պահանջքները եւ

Ներկայացուցիչին պատասխանատուութեան ծիրէն ներս ինքնաբերաբար կ'ընդգրկուի Մելգոնեան Կրթական Հաստատութեան առկախ մնացած ապագան:

Այս այցելութեան մասին բողոքագիրներ հրապարակուեցան Մելգոնեանի Կիպրոսի եւ Քալիֆորնիոյ Սանուց Միութիւններու, ինչպէս նաեւ Դոկտ. Վարդան Օզինեանի կողմէ՝ ուղղուած Նախագահ Խրիստոֆիասին, որոնք անդրադարձան Պետական Ներկայացուցիչին բացակայութեան: Իմ կարգիս, Փետրուար ամսուայ ընթացքին մտերմիկ զրոյց մը ունեցայ Հանրապետութեան Նախագահին հետ եւ ապա գրաւոր նամակ մը յղելով անոր, մատնանշեցի բացակայութեանս պատճառաւ համայնքս պատշաճօրէն տեղեակ չպահելու իրականութիւնը: Իր կարգին, Նորին Վսեմութիւն Պրն. Խրիստոֆիաս նամակով մը զիս տեղեկացուց, թէ յառաջիկայ նմանօրինակ հանդիպումներուն տեղեակ պիտի պահուին Կրթական եւ Ներքին գործոց Նախարարութիւններն ու Կիպրահայ Համայնքի Պետական Ներկայացուցիչը:

Վերլուծումներ կատարելու եւ գուշակութիւններ ընելու տրամադրութիւն չունիմ, ո՛չ ալ նպատակ ունիմ հարցականի տակ դնելու Հ.Բ.Ը.Մ. Կեդրոնական Վարչութեան ապագայ ծրագիրները: Հասարակ յայտարար մը կայ, որ բոլորս կը յուզէ որպէս Հայ եւ Սփիւռքահայ: Սպիտակ ջարդին ու ծուլման դէմ պայքարելու միակ վահանը Հայ դպրոցն է ու հայեցի դաստիարակութիւնը: Արեւմտահայերէնը նահանջի մէջ է, իսկ Մելգոնեանի փակումով Սփիւռքահայութիւնը եւ ի մասնաւորի՝ Կիպրահայութիւնը իրաւազրկուեցաւ իր ազգային դրոշմէն եւ գոյատեւելու իր միակ կրթօճախէն: Որպէս Կիպրահայ Համայնքի գործող Պետական Ներկայացուցիչ, ականայ ժառանգեցի այս ծանր բեռը, որու բարւոք լուծումին համար կարիքը կայ համագործակցութեան եւ միասնականութեան: Այս ժամանակշրջանը, մեզի համար շատ աւելի ծանր է քան տիրող համաշխարհային տնտեսական տագնապը: Մի քանի տարիէն, թերեւս կա-

րելի ըլլայ վերականգնել աշխարհի տնտեսական հաւասարակշռութիւնը, սակայն դարձեալ Մելգոնեան մը ստեղծելը անկարելի պիտի ըլլայ: Ես ճիգ պիտի չխնայեմ խնդրոյ առարկայ կողմերուն միջեւ համադրողի դերակատարութիւն ունենալու եւ կոչ կ'ուղղեմ բոլորին գործակցելու քանի ուշ չէ: Յանձնարարելի է մէկդի դնել անտեղի պատճառաբանութիւնները եւ անկողմնակալօրէն գործակցիլ՝ ի շահ մեր նոր սերունդի գոյատեւման եւ ազգային դիմագիծի պահպանման:

Գալով Երեսփոխանական Գրասենեակի եւ Ազգային Առաջնորդարանի մօտալուտ միացեալ ձեռնարկին, հաճոյքն ունիմ փոխանցելու, թէ «Լրատու»ի այս թիւին հետ պիտի գտնէք Ս. Մակարավանք ուխտագնացութեան թերթիկը: Մայիս 10-ին, երկրորդ անգամ ըլլալով, ծրագրած ենք դարձեալ այցելել բռնագրաւեալ մեր վանքը, վերանորոգելու մեր ուխտը: Յոյսով ենք, որ մեծ թիւով ազգայիններ իրենց մասնակցութիւնը կը բերեն այս ուխտագնացութեան:

Սիրելիներ,

Խօսքիս աւարտին, Հայ Առաքելական Եկեղեցւոյ Ս. Զատիկին առիթով ընդունեցէք սրտագին բարեմաղթութիւններս:

Քրիստոս յարեաւ ի մեռելոց,

Օրհնեալ է Յարութիւնն Քրիստոսի:

Վարդգէս Մահտեսեան

Կիպրահայ Համայնքի Պետական Ներկայացուցիչ

ԵՌԱՄՍԵԱՅ ԳՈՐԾՈՒՆԵՈՒԹԻՒՆ

Քաղաքացիական հարցեր եւ կեցութիւն

Մեր գրասենեակի առօրեայ աշխատանքները կը շարունակուին նոյն թափով, ըլլայ օրինաւոր կեցութեան եւ աշխատանքի արտօնագիրներ ապահովելու գծով եւ կամ Քաղաքացիութեան դիմում ներկայացնողներուն պէտք եղած օժանդակութիւնը տրամադրելով:

Գալով Հայաստանի Դեսպանատան Հիւպատոսական գործողութիւններուն, յամձնարարելի է որ մեր հայրենակիցները իրենց անցագիրներուն նորոգութիւնները կատարեն ժամկետի եւ վաւերական կնիքի լրացման թուականէն առնուազն երկու ամիս առաջ, փոխանակ վերջին պահուն տեղեկանք պահանջելու հիւպատոսական բաժանմունքէն, որ թէ՛ մեր գրասենեակին եւ թէ՛ հիւպատոսութեան համար յաւելեալ աշխատանք մըն է: Շատեր, Ներքին Գործոց Նախարարութեան Հպատակներու եւ Ներգաղթի Բաժանմունք (Alien & Immigration Unit) կեցութեան արտօնագիր նորոգելու ժամանակ կ'անդրադառնան, թէ իրենց կամ իրենց երեխաներուն անցագիրները ի զօրու չեն:

Այցելութիւն «Գալայճեան» Հանգստեան Տուն



Հայկական Ս.Ծննդեան օրը, Երեքշաբթի 6 Յունուար 2009-ին, Տէր եւ Տիկին Վարդգէս Մահտեսեան, ընկերակցութեամբ Թեմիս Կաթողիկոսական Փոխանորդ Վարուժան Արք. Հերկելեանի, այցելեցին «Գալայճեան» Հանգստեան Տուն եւ Ամանորեայ ու Ս. Ծննդեան լաւագոյն մաղթանքներով եւ անհատական նուէրներով պատուեցին մեր տարեց հայրերն ու մայրերը:

Հպատակութիւն

Յունուարէն Մարտ 2009 ամիսներուն ընթացքին, Նիկոսիա բնակութիւն հաստատած չորս անհատներ հպատակութիւն ստացան, որոնցմէ՝ երկուքը Կիպրահպատակի հետ ամուսնացած ըլլալուն պատճառով:

Շնորհաւորական եւ շնորհակալական գիրեր

Երեքշաբթի, 3 Մարտ 2009 թուակիր նամակով մը, Պրն. Վարդգէս Մահտեսեան իր երախտագիտութիւնը եւ շնորհակալութիւնները յայտնեց Կիպրոսի Հեռուստատեսիլի Ընկերութեան (RIK) տնօրէն Պրն. Թեմիս Թեմիստօքլուսին, իր ցուցաբերած գործակցութեան համար, ինչպէս նաեւ լուրերու բաժնի տնօրէն Եաննիս Քարեքլասին՝ իր ունեցած ներդրումին համար: Յիշեցնենք, թէ անցեալ տարուայ իրենց ունեցած հանդիպումի օրակարգին վրայ եղող կարգ մը հարցերու բարելաման իբրեւ դրական արդիւնք՝ 9 Մարտ 2009-էն սկսեալ Կիպրոսի Ռատիոյկայանի Հայկական ժամէն ամէնօրեայ դրութեամբ հայերէնով լուրեր կը հաղորդուին:

Պետական Ներկայացուցիչը 6 Մարտ 2009 թուակիր նամակով մը շնորհաւորեց Լիմասոլաբնակ հայրենակից 12-ամեայ Ակնէսա Հովհաննիսեանը, որ վերջերս շահեցաւ Կիպրոսի Քարաթէի ախոյանութիւնը:

Պրն. Վարդգէս Մահտեսեան 20 Մարտ 2009 թուակիր անհատական նամակներով շնորհաւորեց Մանօ եւ Եաննօ Գույունճեանները, որոնք Մարտի սկիզբը տեղի ունեցած դահուկարշաւի համակիպրական 16 եւ 14 տարեկանէն վար մրցումներուն, խլեցին առաջնութեան բաժակները:

Իսկ յատուկ գիրով մը, Պրն. Մահտեսեան իր խոր գնա-

հատանքը փոխանցեց ՀՀ Յունաստանի եւ Կիպրոսի Դեսպանութեան Հիւպատոս Տիկ. Լիլիթ Սարգսեանին, որ իր անսակարկ օժանդակութեամբ դիրացուց Կիպրոս բնակութիւն հաստատած մեր հայրենակիցներու հիւպատոսական աշխատանքները, սերտօրէն համագործակցելով Երեսփոխանական Գրասենեակին հետ:

Յիշենք, որ 20 Մարտ 2009-էն սկսեալ, ՀՀ Յունաստանի եւ Կիպրոսի Դեսպանութեան նոր Հիւպատոսն է Տիկ. Լիանա Գրիգորեան:

Պետական-պաշտօնական մակարդակի հանդիպումներ

Կիրակի, 21 Դեկտեմբեր 2008ին, Պրն. Մահտեսեան Ներկայ գտնուեցաւ Մարոնիթ Համայնքի նոր Արքեպիսկոպոս Եուսէֆ Անթուան Սուէֆի օժման արարողութեան, որ տեղի ունեցաւ Մարոնիթներու եկեղեցւոյ մէջ: Արարողութենէն ետք, ան ներկայ գտնուեցաւ նաեւ Արքեպիսկոպոս Սուէֆի ի պատիւ կազմակերպուած ճաշկերոյթին:



Երեքշաբթի, 20 Յունուար 2009-ին, Կիպրահայ Համայնքի Պետական Ներկայացուցիչը ընկերակցութեամբ Կիպրոսի Հայ Աւետարանական Եկեղեցւոյ պատասխանատու Պրն. Հրայր Ճեպճեանի, հանդիպում մը ունեցան Խորհրդարանի Տախազահ Պրն. Մարիոս Կարոյեանին հետ, որու ընթացքին Պրն. Ճեպճեան տեղեկութիւններ փոխանցեց Հայ Աւետարանական Համայնքի գործունէութեան մասին:

Ուրբաթ, 23 Յունուար 2009ին, Պաշտպանութեան Տախարար Պրն. Քոստաս Փափաքոստաս յատուկ հանդիպումի մը իրաւիրեց Կիպրոսի երեք Կրօնական Փոքրամասնութիւններու

ներկայացուցիչները, լուսաբանութիւն տալու ապագայ հաւանական զինուորական ծառայութեան ծիրէն ներս ըլլալիք փոփոխութիւններուն մասին:

Երկուշաբթի, 2 Փետրուար 2009ին, Պրն. Մահտեսեան ներկայացաւ Holiday Inn պանդոկ, շնորհաւորելու Աքէլ Կուսակցութեան նորընտիր Ընդհանուր Քարտուղար Պրն. Անտրոս Կիպրիանուն:

Երկուշաբթի, 9 Մարտ 2009ին, Հայ Պետական Ներկայացուցիչը տեսակցութիւն մը ունեցաւ Ամերիկայի Միացեալ Նահանգներու Կիպրոսի Դեսպան Պրն. Ֆրանք Ուրպանչիքի հետ, ներկայութեամբ Քաղաքական հարցերու պատասխանատու Պրն. ճոն Բատիկանի:



Նշանակում

30 Դեկտեմբեր 2008 թուակիր նամակով մը, Պրն. Մահտեսեան Կրթական Նախարարութեան առ ի վաւերացում առաջարկեց Պրն. Աւետիս Ջուլճեանի թեկնածութիւնը, որպէս Նարեկ Հայկական Վարժարաններու Հոգաբարձութեան անդամ: Պրն. Ջուլճեան պիտի փոխարինէ կազմէն վերջերս հրաժարած Տիկ. Վերա Թահմազեանը:

Ձեռնարկներու Ներկայութիւն

Երեքշաբթի, 6 Յունուար 2009-ին, Տէր եւ Տիկին Վարդգէս Մահտեսեան ներկայ գտնուեցան Լառնաքայի Հայ Ակումբի Ս. Ծննդեան առթիւ կազմակերպած կէսօրուայ ճաշկերոյթին :

Հորեքշաբթի, 28 Յունուար 2009-ին, Պետական Ներկայացուցիչը ներկայ գտնուեցաւ «Հայ եւ Ռուս Արուեստագէտներու» նկարչական ցուցահանդէսին, որ տեղի ունեցաւ Լիմասոլի d/p art gallery-ին մէջ: Բացման արարողութիւնը կատարեց Կիպրոսի Խորհրդարանի նախագահ Պրն. Մարիոս Կարոյեան:

Հինգշաբթի, 29 Յունուար 2009-ին, Տէր եւ Տիկին Վարդգէս Մահտեսեան ներկայ գտնուեցան Հ.Ե.Մ.-ի ակումբին մէջ տեղի ունեցած Տիկ. Նուրիցա Մաթոսեանի պատրաստած «Երկու ժողովուրդներու Սիրտը» վաւերագրական ժապաւնի ցուցադրութեան, նուիրուած Հրանդ Տինքի նահատակութեան Ա. Տարելիցին:

Երկուշաբթի, 2 Փետրուար 2009-ին, Պետական Ներկայացուցիչը եւ Տիկինը ներկայ գտնուեցան արուեստագէտ գեղանկարիչ ճոն Կէվիէրեանի ցուցահանդէսին, որ տեղի ունեցաւ Նիկոսիոյ Apocalypse ցուցասրահին մէջ: Բացումը կատարեց Առողջապահութեան Նախարար Պրն. Խրիստոս Փաթալիտիս:

Հորեքշաբթի, 4 Փետրուար 2009-ին, Տէր եւ Տիկին Վարդգէս Մահտեսեան ներկայ գտնուեցան Համազգայինի Կիպրոսի «Օշական» մասնաճիւղի կազմակերպած՝ Լիբանանահայ կատակերգակ՝ Փիէռ Շամմասեանի ներկայացումին, որ տեղի ունեցաւ Առաջնորդարանի «Իւթիւճեան» սրահին մէջ:

Հորեքշաբթի, 18 Փետրուար 2009-ին, Պետական Ներկայացուցիչը եւ տիկինը ներկայ գտնուեցան Նոր Սերունդ Մշակութային Միութեան ակումբէն ներս կազմակերպուած «Հայ Անհատը եւ Ազգային Կեանքը» բազմաձայն զրոյցին:

Ուրբաթ, 6 Մարտ 2009-ին, Տէր եւ Տիկին Վարդգէս Մահտեսեան ներկայ գտնուեցան Համազգայինի Կիպրոսի «Օշական» մասնաճիւղի կազմակերպած «Կիպրահայ Արուեստագէտներու» զործերու ցուցահանդէսի բացումին, որ տեղի ունեցաւ Առաջնորդարանի «Իւթիւճեան» սրահին մէջ: Այս ձեռնարկը կը վայելէր Պետական Ներկայացուցիչին հովանաւորութիւնը:

Հորեքշաբթի, 11 Մարտ 2009-ին, Պրն. Վարդգէս Մահտեսեան բացումը կատարեց երիտասարդ Կիպրահայ գեղանկարիչ Սեւան Մալիքեանի ցուցահանդէսին «Ճամբորդութեան սկիզբը» խորհագիրով, որ տեղի ունեցաւ Լառնաքայի Aspelia Gallery-ին մէջ: Ան իր քաջալերանքի խօսքին մէջ անդ-

րադարձաւ արուեստագէտին գործերուն մէջ նշմարելի իր արմատներուն եւ ծննդավայրին հետ կապի արտայայտութիւններուն:

Չորեքշաբթի, 24 Մարտ 2009-ին, Պետական Ներկայացուցիչը եւ Տիկինը ներկայ գտնուեցան Կիպրոսի Հայ Դատի կազմակերպած հասութաբեր ձեռնարկին, մասնակցութեամբ հայրենի երգիչ Թաթա Սիմոնեանի եւ իր նուագախումբին, որ տեղի ունեցաւ Նիկոսիոյ «Բաւիլիոն» սրահէն ներս: Այս անմախընթաց ձեռնարկը կը վայելէր հորհրդարանի հայազգի նախագահ Պրն. Մարիոս Կարոյեանի հովանաւորութիւնը եւ ներկայութիւնը:

Հայկական հին գերեզմանատուն

Կիրակի 22 Մարտ 2009-ին, յատուկ եկեղեցական արարողութեամբ եւ հանդիսապետութեամբ Կաթողիկոսական Փոխանորդ Տէր Վարուժան Արք. Հերկելեանի եւ Տէր Մոմիկ Քահանայի, վերանորոգուած Հայկական հին գերեզմանատան մէջ վերաթաղուեցան դուրս բերուած աճիւնները, որ Ապրիլ 2005էն, բոլորիդ ծանօթ պատճառներով, Ս. Պօղոս մատուռէն ներս զետեղուած էին յատուկ տուփերու մէջ:

Որպէս Կիպրահայ Համայնքի Պետական Ներկայացուցիչ, աշխատանքներուս առաջնահերթ նպատակներէն մէկն էր դասաւորել այս գերեզմանատան հարցը, որ մեծ փոթորիկ ստեղծած էր Կիպրոսի հայ թէ օտար շրջանակներէն ներս:

Ուստի, 27 Հոկտեմբեր 2006 թուակիր նամակով մը ուղղուած Ներքին Գործոց Նախարար Պրն. Նեոքլիս Սիլիկիոտիսին, խնդրեցի Կառավարութեան միւթական օժանդակութիւնը վերանորոգելու այս մշակութային արժէք ներկայացնող վայրը: Նամակին հետ ներփակուած էր նաեւ 4arc+ ճարտարապետական ընկերութեան ներկայացուցած ծախսերու նախահաշիւը (Budget):

Հետապնդումներէ եւ զանազան պետական մակարդակի տեսակցութիւններէ ետք, 12 Նոյեմբեր 2007 թուակիր նամակով մը, Ներքին Գործոց Նախարարութիւնը զիս տեղեկացուց, թէ Կիպրոսի Կառավարութիւնը որոշած էր Կ.Ո. 90.000 (մօտ €154.000) տրամադրելով, մասնակցիլ բարեգարդման աշխատանքներուն :



Ծանօթանանք Կիպրոսի Հանրապետության Օրենքներուն

Պարտադիր Չինուորական Ծառայութիւն

19 Յունիս 2007 թուակիր Նախարարաց Խորհուրդի թիւ 65.732 որոշումով, Կիպրոսի Կրօնական Փոքրամասնութեանց (Հայ, Մարոնիթ, Լատին) պատկանող՝ 18 տարիքը եւ երկրորդական ուսումը ամբողջացուցած տղաք, որոնք ծնած են 01.01.1990-էն ետք, 2008 թուականէն սկսեալ մաս կը կազմեն պարտադիր զինուորական ծառայութեան ծրագիրին:

Ծառայութեան լրիւ շրջանը 25 ամիս է, որ առ այժմ անփոփոխ կը մնայ, հակառակ վերջին շրջանին զայն նուազեցնելու փորձերուն:

Կիպրահպատակներ, որոնք 10 տարիէ աւելի իրենց ընտանիքներուն հետ դուրսը ապրած են եւ կը փափաքին դարձեալ Կիպրոս հաստատուիլ, ենթակայ են զեղջուած ժամանակաշրջանով զինուորական ծառայութիւն կատարել՝ ըստ Կիպրոս վերադարձի ժամանակ իրենց տարիքին:

Ստորեւ կը ներկայացնենք տարիքներով ենթաբաժանումները.-

1. Անոնք, որոնք Կիպրոս վերադարձի ժամանակ 26-49 տարիքի միջեւ են, 3 ամսուայ ծառայութեան ենթակայ են:

2. Անոնք, որոնք Կիպրոս վերադարձի ժամանակ 18-26 տարիքի միջեւ են, 6 ամսուայ ծառայութեան ենթակայ են:

3. Անոնք, որոնք Կիպրոս վերադարձի ժամանակ 13-18 տարիքի միջև են, 12 ամսուայ ծառայութեան ենթակայ են:

4. Անոնք, որոնք Կիպրոս վերադարձի ժամանակ 10-13 տարիքի միջև են, 18 ամսուայ ծառայութեան ենթակայ են:

Նկատի առնելով վերոյիշեալ տուեալները եւ ըստ մեզի փոխանցուած Պաշտպանութեան Նախարարութեան տեղեկութեանց, իւրաքանչիւր հարց սակայն կը քննուի անհատաբար իր էութեան մէջ:

Յաւելեալ տեղեկութիւններու համար հեռաձայնել.-

Պաշտպանութեան Նախարարութիւն	: 22-807525
Նիկոսիոյ զինուորական գրասենեակ	: 22-515238
Լառնաքայի զինուորական գրասենեակ	: 24-411300
Լիմասոլի զինուորական գրասենեակ	: 25-369850
Պաֆոսի զինուորական գրասենեակ	: 26-933270

Վարդգես եւ Մակի Մահտեսեաններ
 Քրիստոսի Յարութեան
 Սուրբ տօնին առիթով
 կը շնորհաւորեն Կիպրահայ Չամայնքը
 եւ մեր հայրենակիցները
 մաղթելով՝
 առողջութիւն եւ արեւշատութիւն
Քրիստոս յարեալ ի մեռելոց,
Օրհնեալ է Յարովիման Քրիստոսի

**ԿԻՊՐԱՅԱՅ ՀԱՄԱՅՆՔԻ ՊԵՏԱԿԱՆ
 ՆԵՐԿԱՅԱՑՈՒՑԻՉԻ ԳՐԱՍԵՆԵԱԿ**

Քաղաքական Գրասենեակ

9B & C Kastorias Street, Ayia Paraskevi, 2002 Strovolos
 Հեռախօս 22- 45 45 40, Հեռատիպ 22- 42 46 42
 Ել. Հասցէ office@armenianmp.com
 Ոստայնէջ՝ <http://www.armenianmp.com>

Խորհրդարանական Գրասենեակ

Office Δ-2-2, House of Representatives, 1402 Nicosia
 Հեռախօս 22- 40 72 02, Հեռատիպ 22- 40 74 42
 Ել. Հասցէ vmahdessian@parliament.cy